

# Ephesians

## Paul An Fef Igayam Ephesus Yangan Auris

---

**1** <sup>1</sup>Yau Paul on God an gogoi ai on ifouriu anat Keriso Iesu an baiyoyobotin amatar—yau atonio fef agagayam omi aurim, osi God an sabu iyabon nan Ephesus mafam gagaminai semama auris, osi asi yawasai on sebitutum semama ato sinat Keriso Iesu mat sibikaita auris on:  
<sup>2</sup>Yau ababayoi God Tamat a Bada Iesu Keriso an kabera an tuf initem.

### Kerisoai God Ayu An Baimomogin Itet

<sup>3</sup>Ot on God a Tamat ati Bada Iesu Keriso on tanikakawai! Yabin ot tanat Iesu Keriso mat tabikaita on ayubit an siwar engon tutufin safam emon esusur. <sup>4</sup>God tafanam men ifourai an werai on, On ainau irubinet nono tanat Kerisoai on On noan mes tamatar, onai ot on kakafotit a ati bokomas ambin On nanai tattawar.

Yabin On an nuabo emon on <sup>5</sup>God inonotai nono Iesu kerisoai on On itiyamet On nanatun mes tatmatar—atonio bobo on On an gogoi nanaba itafour mes. <sup>6</sup>Ot on God an kabera gagamin bag aurin on tanifain, ato On Natun an nuabo siwar an baiyan ambin ibitet aurin on! <sup>7</sup>Keriso irarabob emon on ot on sirufanit, on min ati bokomas on sinnotbur. Yabin God an kabera on gagamin bag, <sup>8</sup>On an kabera on gagamin bag awan bonuin itet!

God an gigiboan a an sagob tutufin <sup>9</sup>on On an gogoi inonotai on bobo on rerebai itboai itgat, ato On an bainonot buburin ainau inonotai i'yen nono on Kerisoai nan on bobo itiyamai itnat ititutum, ato on bobo min ibo igat aurit irerebai. <sup>10</sup>Atonio bainonot, on an wera bag innat on God on bobo iniyamai initutufin, on min tafanam engon tutufin inboai innat inikaita, bobo engon tutufin safamai a tafanamai sen auris on Keriso On innat ini Unin.

<sup>11</sup>God an bainonotai a an gogoi ai on atonio osi bobo engon tutufin ifouren; ato Keriso mat tabikaita on Bada irubinet On nanatun mes

tamatar, yabin On Toun an gogoiai, osi bobo engon tutufin auris on anai bag nan inonoten. <sup>12</sup>Ot sabu on ainau bag ati baitutum on Keriso aurin tayein, ot on sirubinet onai ot God Wabin gagamin aurin on tanifain!

<sup>13</sup>Ato omi mat dura maiain wotatam on wonat God an sabu mes womatar, Wasagobin on omi ami yawas ibo inat. Omi Keriso woitutumai ato God an kufotot ibo ikufotem nan on iyoboem omi on On ebinoanai ato Ayu Kakafotin aurim iyaumatanim ibitem on nan. <sup>14</sup>Ot on Ayu tabo nono on mes God aifan an sabu auris i'yaumatan on tanboai, ato gibui God inboet an ra on osi sabu iyabon God ebinoanis on arimon totor wat inrufanis insawar. On mes ot God Wabin gagamin on tanifain taniduduranai.

### Paul an Bayoi

<sup>15</sup>On yabin yau omi duram atatam Iesu Keriso wobitutumai a ami nuabo on God an sabu auris woyeyeinin aurin on mes, <sup>16</sup>omi aurim on yau ra fufur God abikakawai. Yau ababayoi an ra on omi anonosim <sup>17</sup>ato ati Bada Iesu Keriso on God Tamat kudidirin on aurin ababayoi Ayu initem, On iniyamem wonigigiboan On an sagob on wonboai a On God inboai ingat omi aurim, onai omi On wonsagobai. <sup>18</sup>Yau On aurin abifefeyan omi nunuam on sinruserenen On an ratafin on wonitai, onai omi wonsagob atonio sawar aurin iyorem on wonboai mes, on sawar on God an baiyawas on wonboai mes, On an baimomogis auris on an sabu auris iyaumatan, <sup>19</sup>ato ot sabu iyabon God tabitutumai on an faiwar gagaminai bag on aurit ebobo. Atonio faiwar ot usiti ebobo on faiwar kaitamom on faiwarin faiwarin bag. <sup>20</sup>God on faiwar kaitamom on iyamai Keriso rabob emon ibobaimisirai ato an asumaiauai imair safamai emama. <sup>21</sup>Keriso on nan aiyetunai safam an baintewaris engon tefasi, babadis, faiwaris, a bada engon tutufin ebinetewaris; On Wabin on Gagamin bag men atonio babadis engon tutufin wabis ba atonio tafanamai a tafanam gibui enat on nanaba on. <sup>22</sup>God on bobo engon tutufin Keriso an faiwar babanai iya, ato irubinai inat ekalesia yangan asi Unin gagamin faiwarin bag imatar bobo engon tutufin auris. <sup>23</sup>Ekalesia on Keriso usin, ato Keriso Toun on ekalesia a bobo engon itutufin eta au engonai on itutufinai.

### Rabob emon Tanat Tayawas

**2** <sup>1</sup>Ainai bag omi on ayuai nan worabob womama yabin omi woifonaseir a wobokomas on fasinai. <sup>2</sup>On an werai omi on tafanam an yawas komasis on wobigibubunuai; omi on orot komasin on ayu engon safamai ibinetewar on osi auris on wobifonabo, osi sabu iyabon God aurin sebifonaseir on, atonio ayu on ari sabu ebinetewaris. <sup>3</sup>Ainai bag ot engon tutufin on osi ba ato usit an gogoiai on nanaba tama; ot usit a

ati not an gogoi on nanaba bobo tafouren, ot usit an yawasai on, ot sabu engon tutufin ba, ot on God an yatatab emon on baikokosar tatboai mes.

<sup>4</sup>Baise God an kabere on irat kwakwan, a On an nuabo ot aurit on irat kwakwan bag, <sup>5</sup>ot ati fonaseir fasin emon on ayuai tarabob tamama ato God on Keriso a ot mat iboet tanat yawas itet. God an kabere emon on iyawasim. <sup>6</sup>Ot Keriso Iesu mat tabikaita on God ibogaiit tagai ayubit an yawas boboun itet onai ot On mat on safamai nan taninetewar. <sup>7</sup>On atonio bobo ifour onai ra gibui enat aurin on an kabere gagamin fafa bag on ot sabu engon tutufin on itiyoboet mes, ato Keriso Iesu an nuabo emon on an kabere iyoboet. <sup>8-9</sup>Omi Keriso wobitutumai on mes God an kabere emon on iyawasim. Omi on men toum woiyawasim on, baise atonio on God an siwar, on mes omi men toum wonifaim wonau omi ami bobo emon on toum woiyawasim. <sup>10</sup>God on ot ati Fouritotin, ato Keriso mat tabikaita on bobo obis fouren auris wat on ifourit, On atonio bobo on ainau bag ibotitiwag ot aurit nanaba tatafour mes.

#### Kerisoai on Kaitamom

<sup>11</sup>Omi sabu worarat on men Jew yangan on—Jew yangan omi seyoyorem sau, “Men siaskibubues on,” osi tous seyoyores sau, siaskibubues (atonio askibubu on orot jever tous usisi sebiyamen on)—omi wonnos ainau mamaba womama on. <sup>12</sup>On an werai omi on men Keriso mat woikaita on. Omi on sabu toumanim ato omi on men God an sabu rurubinim On ebinoanai on. God an dura bobai basit ainau Jew yangan auris i'yaumatan on amonai on omi wabim nan ambin. Omi atonio tafanamai womama on men God an yawas wobo on a omi God men wosagobai on. <sup>13</sup>Omi ainau on mabimui bag womama, baise ari on Keriso irarabob an taraiai on iboem wonat Keriso Iesu mat woikaita. <sup>14</sup>Yabin Keriso Toun on tuf ibo inat ato iyamai Jew yangan a sabu men Jew yangan on sinat sabu kaitamom simatar. On Toun usin emon on osi basusi goa an fafa i'yen a on ibiyames sibigigit bonen on igoros isur. <sup>15</sup>On Jew yangan asi Baifafaro dura a asi baifafaro asi eta on igorosen, onai sabu kuayo ruam magis ta ta on itboes sitnat Kerisoai sitikaita sabu bobous kaitamom wat sitmatar, on etaiai on tuf iyamai imatar. <sup>16</sup>Keriso nabai irarabob nan on basusi gigit i'yen on igoros; nab emon on, On usis ruam ta ta on iboes sinat usin kaitamom simatar a On iboes imatabir men God aurin. <sup>17</sup>On mes Keriso inat ato tuf an Wasagobin on ikurereb omi sabu men Jew yangan aurim, omi God emon on nanenei bag womama, a Jew yangan on God aurin on bisinai bag semama. <sup>18</sup>Keriso emon on, ot engon tutufin Jew yangan a sabu men Jew yangan, on fofonin tannat Ayu kaitamomai Tamat nanai tantawar.

<sup>19</sup>On mes omi sabu men Jew yangan omi on men sabu toumanim o nanawanotim on; omi on ari wonat God an sabu a an dam warar mes

womatar. <sup>20</sup>Omi mat on goa arir tutut ato baiyoyobotis a aubairuruotis sirorouin on tefanai nan siyonim, Keriso Iesu Toun on arir gagamin bag on goa aurin— <sup>21</sup>Keriso Toun on goa engon tutufin ebota ebiyamai erarat enat Bada an tafaror goa kakafaiin mes. <sup>22</sup>Omi wonat Keriso mat wobikaita on omi mat on sabu fani mat kaitamomai siyonim efan menan God an Ayu emama on nan.

### Paul an Bobo Sabu Men Jew Yangan auris Iboen

**3** <sup>1</sup>On yabinai yau Paul, on Keriso Iesu fasinai on fafatum goai amama, yabin yau On abiagirai on mes, a yau on omi sabu men Jew yangan weinem on aurim abobo, a yau God aurin ababayoi. <sup>2</sup>Dura bag omi dura wotatam God an kaberau on atonio bobo iteu omi anibaisim mes. <sup>3</sup>God an bainonot buburin on, ibo igat au rereb ato iyobo. (Yau atonio aurin on dura dibon wat agayam, <sup>4</sup>ato yau dura agayam wonbibiyab on, wonsabog yau on dura bag Keriso an dura maiuin buburin on asagob.) <sup>5</sup>Sabu ainau bag simama on men atonio dura buburin auris sidudur on, baise God on ari Ayuai nan ibo igat irerebai an baiyoyobotis a an aubairuruotis kakafotis auris. <sup>6</sup>Dura buburin an yabin min atonio: Wasagobin emon on sabu men Jew yangan on God an baimomogin Jew yangan ebites on turin sinboai; osi on sinned usin kaitamom sinmatar ato God on Keriso Iesuai an aumatan ibiyamai on sinfasaram.

<sup>7</sup>God an kaberau an siwar gagamin emon on yau iyameu anat wasagobin an agirotiu amatar, on bobo on Toun an faiwar on usiui on nan iteu. <sup>8</sup>Yau on wabiu ambin bag God an sabu engon auris; baise God atonio bobo iteu Wasagobin ato Keriso On sawarotin aurin on men fofonin awati tanikakafunen on, sabu men Jew yangan auris on anboai angkat mes, <sup>9</sup>ato abiyamai sabu engon tutufin ato God an bainonot buburin inbobo on sinitai. God, On sawar engon tutufin Fouritotin, On ainau bag on sawar engon tutufin ibunien si'yen, <sup>10</sup>onai ari ra ekalesia emon on, anea nan safamai sebinetewar a asi faiwar sebotan on God an gigiboan ta ta on sinitai sinsagob. <sup>11</sup>God atonio bobo on anai bag inonotai, On Keriso Iesu ati Bada emon on bobo iyamai imatar. <sup>12</sup>Ot Keriso mat tabikaita a ati baitutum On aurin tayeyeinin on men tabeber on totor wat tanan God nanai tantawar. <sup>13</sup>Yau abifefeyanim omi men ami not sinafeu mes yabin yau omi wabim duram aurin on abikokosariu.

### Keriso An Nuabo

<sup>14</sup>On yabinai yau sindau arou Tamat aurin ababayoi, <sup>15</sup>on dam warar engon tutufin safamai a tafanamai semama on Wabin maiuin bag on ebites. <sup>16</sup>Yau God aurin ababayoi On an baimomogin gagamin on an Ayuai nan faiwar initem nunuamui wonfaiwar, <sup>17</sup>ato yau ababayoi on omi

ami baitutumai on Keriso arimon an goa on omi nunuamui inyon inama. Yau ababayoi omi on awerorom a ami tutut on nuaboai nan wonyein, <sup>18</sup>onai omi a God an sabu mat on faiwar wonboai wonsagob tiwag, Keriso an nuabo on gagamin gagamin bag men fofonin tanifofon on. <sup>19</sup>Dura bag yau on ababayoi omi on wonnat On an nuabo on wonsagob, basit omi men arimon engon tutufin wonsagob tiwag on—on mes omi engon tutufin wonnat totor God an Itin ba wonmatar.

<sup>20</sup>God an faiwar ot usiti ebobo on mes On arimon bobo gagamis ato gagamis bag on aurit infouren, On ato bobo gagamis infoouren on, men arimon tanbayoi o taninonotai fofonin on: <sup>21</sup>On mes ot sabu iyabon ekalesia amonai tamama ot tanat Keriso mat taikaita on ra fufur God a Keriso Iesu on tanifain taniduduranai au wantoan au wantoan! Dura bag.

### Usin Kaitamom

**4** <sup>1</sup>Yau on fafatum goa amonai amama yabin yau Bada aurin abobo on mes: Yau awurem on, God iyoyorem on yawas obinai wat On an gogoi ai nanaba wonama. <sup>2</sup>Omi on ra fufur wontafoum, nuataiai, a yaterabobai nan wonama. Omi on tuturam mat on nuaboai nan wonibaibais bonen. <sup>3</sup>Omi wonafourtoyon Ayu ato iboem wonat wobikaita on nana wonbokikin, On tufai nan iyousim woikaita. <sup>4</sup>Ot engon on usin kaitamom On ebinoanai, a Ayu kaitamom, on nanaba ot on God an yawas kaitamom on yaterabobai tamomousin, on min ato God irubinem On an Wasagobin wobitutumai nan. <sup>5</sup>Bada on kaitamom, baitutum kaitamom, bapataito kaitamom; <sup>6</sup>God on kaitamom wat ato On on sabu engon tutufin Tamas, On min sabu engon tutufin asi Bada, On min on sabu engon tutufin ebiyames an bobo sinabo mes, a On min On sabu amosi emama.

<sup>7</sup>Ot sabu kakaita kakaita on Keriso an kabere gagamin emon on an siwar gagamis ot sabu ta ta itet. <sup>8</sup>God an dura buk amonai sigayam siyau, “On igai inai efan aiyetunai bag i’boai on sabu engon tutufin fafatum amonai simama on mat iboes sigai, ato On siwar on sabu engon tutufin ites.”

<sup>9</sup>Ato “On igege,” au aiyetun an yabin min abifan? On an yabin min ainau on isur tafanam babanai bag. <sup>10</sup>On mes Iesu on safam emon isur au tafanam, ato On Kaitamom on igai inai au aiyetun, igai aiyetun bag safam igiseirai, On bobo nanaba ifour tafanam engon On aurin itboai itinoanai mes. <sup>11</sup>Keriso On “siwar on sabu engon tutufin ites;” On sabu fani on irubinis sinat baiyoyobotis simatar, On sabu fani on irubinis sinat aubairuruotis simatar, On sabu fani on irubinis sinat wasagobin aurin dura kurerebotis simatar, On sabu fani irubinis sinat ayubit an kaifarotis a baibebeotis simatar. <sup>12</sup>On atonio bobo ifour God an sabu engon tutufin itbotitiwagis Keriso sebigibubunuai yangan asi bobo sitabo mes, onai osi

on Keriso usin on sityon itag mes. <sup>13</sup>On mes ot engon tutufin tannat ati baitutum kaitamomai a God Natun an sagobai on nan tanikaita; onai ot on ati baitutumai tanarat gagamit Keriso ba tanmatar. <sup>14</sup>Namon ot on men fifirig gugudis ba tanama, ato osi sabu baisigogo'otis asi baibebeai on siniyamet wa ba yawaradai inrabit mabiti tanan a yabat ba insisinet eta taniai tanan, osi sabu asi baisigogo sebiyamen on tuturas sebisigoes eta fetagai nan senan. <sup>15</sup>Baise, ot on nuabo an Ayuai on dura maiauin wat tanikakafun, ot on eta au engonai Kerisoai nan tanarat, ot sabu engon tutufin ati Unin min On. <sup>16</sup>Keriso an bainetewar babanai on usit tuturis ta ta on engon senat sebikaita, usit asi kofan engon iboen enat ebikaita on usit tutufinai ibo ebotan. Ato usit tuturis kakaita kakaita mabis mabis sebobo on, usit tutufin on erarat ato nuaboai ebifaiwarai.

### Kerisoai Yawas Boboun

<sup>17</sup>Bada Wabinai dura wawaninai awurem: omi on men eteni sabu asi yawas ba nana wonama mes, osi asi not on engon wagas wat <sup>18</sup>a osi asi not on woumanai nan sen. God yawas ebitet on osi arimon men sinboai on, yabin osi on men segogoi sinsagob a osi on nunuas wawanis. <sup>19</sup>Osi on men meyan mamai tani eboes on; osi asi yawas engon tutufinai on bobo komasis wat on sefofour semama a osi on nana ra fufur segogoi bobo komasis on sinfofour men aifan tani inyafotes on.

<sup>20</sup>Omi Keriso aurin on men on nanaba wosagob on! <sup>21</sup>Omi on dura bag Keriso duran wotatam, ato omi wonat On an baigibubunuotin womatar an dura maiauin Iesu'ai on sibebezem. <sup>22</sup>On mes omi ami yawas atamanisi womama on wonikiriren, on yawas atamanis ibiyamem ami yawasai on nanaba womama—yawas atamanis ainau womama on ibiyamem ibikomasim bag yabin yawas komasis on ibisigoem on an gogoi yawas on wotfofour mes. <sup>23</sup>Omi nunuam a ami bainonot on woniyamai bobous bag sinmatar. <sup>24</sup>On mes omi on wonat orot jever boboun womatar, orot jever boboun on God ifourai enat On an Itin ba emamatar. yabin On an yawas on ebiyamai rerebai sabu engon tutufin sinitai on dura maiauin totorin a kakafotin wat.

<sup>25</sup>Omi baisigogo dura on wonikirir! Omi engon tutufin on dura maiauis wat baitutumotim tuturam auris wonikakafun, yabin ot sabu engon tutufin on tanat taikaita Keriso usin tamatar. <sup>26</sup>Omi yam sintatab on, men ami yatatab wonikirir ato on inbonanawaiim wonan wonbokomas, a omi men nana rai wonbiyatatab inan awa inafom mes. <sup>27</sup>Omi men Afaguban wera wonitai on nan iniyamem wonbokomas mes. <sup>28</sup>Orot iyafan ebabainau on bainau inikirir ato bobo obin inboai inabo; onai on agim obin inboai ato toun inkaifarai a on fofonin arimon sabu kokoianis inibaisis. <sup>29</sup>Omi men dura komasis wonikakafun tuturam woniyababanis mes, baise baibais an dura obis wat on wonikakafunen, on baibais dura

on asi gogoi on inboai inyon weines, ato on dura aifan ubikakafun on sabu iyabon om si'tatamim on inibaisis asi bobo obis sinafour aurin. <sup>30</sup>Ato God an Ayu Kakafotin on men woniyamai iniyababan mes; yabin Ayu on God an kufotot, omi on ikufotem Toun ininoanai mes, God Ayu item iniyoboem onai an Ra innat on God arimon iniyawasim. <sup>31</sup>Omi ya forab, ya komas a yatatab on engon wonikiriren. Omi men gibui tuturam wonagam wonawures woniyokues mes. Omi men tuturam auris dura komasis wonikakafun a men turam tani wonisisiweiai mes. <sup>32</sup>Baise omi on wonmanau wonkaber a tuturam auris woniyababan, a tuturam mat woninotburem, ato God On Kerisoai ibinotburem ba.

### Ot on Ratafinai Tanama

**5** <sup>1</sup>Omi on God nanatun an nuabo, on mes omi wonafourtoyon On an yawas ba on nanaba wonama. <sup>2</sup>Omi ami yawas on nuabo on ininetewarim, ato Keriso ibinuaboit ba a On an yawas on siwar yanden ninibin ba on ot aurit ikutetai ato on sirifu on God iyasisirai.

<sup>3</sup>Omi sanamui nan on men kuke foro asi yawas ba woniyayar mes o men yawas dumadumais on wonfouren mes o men sabu fani asi sawar on woneit wongogoien wonabo mes. Omi on God an sabu on mes iyobin osi bobo komasis nanaba on men wonafour onai sabu arimon men bobo komasis auris siniubarem mes. <sup>4</sup>Mat omi sanamui on men dura komasis wonikakafunen mes. Omi on men mamai an dura, dura wagas wat, o baiyyar an dura wonikakafunen mes. Baise omi on God wat on wonikakawai. <sup>5</sup>Omi wonsagob tiwag: men iyafan tani an efan on Keriso a God an Baiaiwabai inboai, on iyafan inbiyyar, mamai an bobo infour o sabu fani asi sawar bo auris ingogoien on. (Yabin sabu fani asi sawar eiten egogoien bo mes on om min baisigogo god on ebiagirai.)

<sup>6</sup>Omi men woniyamai iyafan tani an awa sareu duraiai nan inisigoem mes; yabin atonio osi dura auris on God an yatatab arimon innat osi sabu iyabon men On aurin sebifonabo auris. <sup>7</sup>On mes osi sabu on men mat wonikaita mes. <sup>8</sup>Ainau bag omi toum on woumanai nan womama, baise ari omi wonnat Bada an sabu womatar on, omi on ratafinai womama. On mes omi ami yawas on woniyamai ratafin an sabu ba wonama. <sup>9</sup>Yabin ratafin an uwan on sawar obis ta ta, yawas totorin a dura maiauin on iboen enat. <sup>10</sup>Omi wonafourtoyon yawas ato Bada ebiyasisirai on wonsagob. <sup>11</sup>Omi on men ato bobo yabis ambis sabu sefoufour on nanaba wonafour mes, osi bobo on wouman ebinoanai. <sup>12</sup>(Sabu ato bobo bubuniai nan sefoufour auris tanbikakafunen on arimon mamai gagamin inboet.) <sup>13</sup>Ato bobo engon tutufin au ratafin sinboai singat on, asi yawas maiauin on rerebai ibo igat; <sup>14</sup>ato bobo aifan rerebai ibo egat au ratafin on sebikomasai. On fasinai sabu fani dura si'yu ba,

“Om orot jever iyafan yenbubur on unmisir, om rabob emon unmisir ato Keriso on om usimui intagawai.”

<sup>15</sup> On mes omi wonkaifarem tiwag mamaba ami yawasai wonama aurin on. Omi on men sabu ojis asi yawasai ba wonama mes, baise omi on sabu gigiboanotis asi yawasai ba wonama. <sup>16</sup> Omi ra fufur yawas obis wat on wonafour, yabin ari ra on sabu bobo komasis sefour. <sup>17</sup> Omi on men sabu ojis ba wonama mes, baise wonafourtoyon Bada mamaba egogoi omi bobo wonabo On aurin on wonsagob.

<sup>18</sup> Omi on men wine wontoman wonikokok mes, baise woniyamai Ayu on inibonuem. <sup>19</sup> Omi tuturam mat on God an buk psalm, tafaror asi kwarer a ayubit asi kwarer on nan mat wonikakafun bonen; omi kwarer kakafaiis a psalm Bada aurin wonkwakwarer on nunuamui mat wonifain. <sup>20</sup> Ati Bada Iesu Keriso Wabinai, omi ra fufur bobo obis auris on Tamat God aurin wonikakawai.

### Awawam Jever a Orot

<sup>21</sup> Omi on toum wonibasitem bonen yabin omi on Keriso wokakafai on mes. <sup>22</sup> Jever, omi on awawam orot auris wonifonabo mamaba Bada aurin wobifonabo ba. <sup>23</sup> Yabin orot on an baibad awan jever aurin yen mamaba Keriso an baibad ekalesia aurin yen ba; a Keriso Toun on ekalesia an Baiyawasotin, on min On usin. <sup>24</sup> On mes jever on awawas orot auris sinifonabo tiwag bobo au engonai mamaba ekalesia on Keriso aurin ibifonabo ba.

<sup>25</sup> Orot, omi on awawam jever woninuabois tiwag mamaba Keriso ekalesia aurin ibinuaboai a On an yawas ikutetai irarabob ba. <sup>26</sup> Keriso bobo nanaba ifour itiyamai God aurin Kakafotin itmatar. On God an dura ikakafun a sareuai nan on ekalesia isou iyamai igumidar, <sup>27</sup> onai ekalesia on itboai Toun itinoanai obin fafa bag—matafin a an komasin ambin, men duma itikafeyan a men boreg o men bobo dumadumais fani sitikafeyan mes. <sup>28</sup> Orot on awawas jever sininuabois mamaba osi tous usis sebinuaboen ba. Orot iyafan awan jever ebinuaboai on toun aurin ebinuabo. <sup>29</sup> (Men iyafan tani toun usin isisiweiai on. Baise on usin bayu ebituai a ekakaifarai, mamaba Keriso ekalesia aurin ifofour ba, <sup>30</sup> yabin ot on On usin turin.) <sup>31</sup> God an dura buk amonai sigayam siyau, “On yabinai orot on arimon ayon taman inikirires ato awan rus sinikaita, ato osi rus on sinned kaitamom sinmatar.” <sup>32</sup> Dura maiuin buburin on atonio dura buk amonai sigayam on nan ibo igat, ato yau asagob on Keriso a ekalesia on auris ebikakafun. <sup>33</sup> Baise atonio dura min omi mat aurim on ebikakafun: Omi orot kakaita kakaita on awam woninuabois ato toum wobinuaboim ba; a jever kakaita kakaita on awawas orot sinkakafes.

### Fifirig a A'yos Tatamas

**6** <sup>1</sup> Fifirig, omi on Keriso an baigibubunuotim on mes ami bobo on, a'yom tamam auris wonifonabo yabin atonio bobo on totorin on



nanaba wonafour. <sup>2</sup>Baifafaro dura iyau, “Ayom tamam unkakafes,” atonio on baifafaro dura ainauin siyaumatan ot ati obin aurin: <sup>3</sup>Aumatan tefanai siyeyeinin on dura ato nanaba iyau, “Bobo engon tutufin obis on arimon sinmatar omi aurim, ato omi arimon wera weromin tafanamai wonama.”

<sup>4</sup>Dad bab, omi nanatum duraiai wonbitotoris on men wonrabon kwakwan ato woniyames siniyatatab. Baise omi nanatum on wonkaifares Keriso an yawasai nan wonibebeyes tiwag a wonawures Bada sinitutumai.

### **Agirotis a asi Babadis**

<sup>5</sup>Agirotim, omi ami babadis tafanamai auris on berai a kakafai nan auris wonifonabo; ato on bobo on nunuam tutufinai woniyamai, sitau omi on Keriso wobiagirai bait. <sup>6</sup>Omi men ami babadis seruruaiim on mes on bobo nanaba wonafour on, yabin omi wogogoi ami babadis sinau on omi bobo obin bag wofofour; baise omi on Keriso an agirotim on mes omi on nunuam tutufinai mamaba God egogoi on nanaba wonabo. <sup>7</sup>Omi agirotim bobo wobobo on woniyasisir auman, sitau omi on Bada wobiagirai bait, men orot jever maiau wobiagirai on. <sup>8</sup>Omi wonnos, mamaba om on agirotim o sirufanin, yabin om am bobo obin ufour aurin on God arimon insiwarim.

<sup>9</sup>Omi babadim, on eta kaitamomai nan wat ami yawas obinai ami agirotis auris wonafour a omi men dura fetag wonau beberues mes. Wonnos omi babadim a ami agirotis on Bada kaitamom safamai on ebinoanai, On eta kaitamomai wat nan sabu ebigurubabanis.

### **God An Baigagam Sawar Wonitakwakwarim**

<sup>10</sup>Dura aifan abikakafun au kanfoun min atonio, omi Bada mat wobikaita on On an faiwar gagaminai nan wontawar wonfaiwar. <sup>11</sup>Baigagam sawar engon tutufin God ebitem on usimui woniwanim, onai Afaguban an baisigogo komasis emon on omi arimon fofonim wontawar woniragitai. <sup>12</sup>Yabin ot on men orot jever maiauis mat tabigagam on baise ot on ayu komasis safamai semama a bainetewarotis, babadis, a ayu asi faiwar ato nin tafanam an woumanai sabu sebinetewaris on mat tabigagam. <sup>13</sup>On mes omi ari bag on God an baigagam sawar woniwanim! Namon bobo komasis asi ra innanat on, ragit orot omi aurim inbiragit on, omi arimon fofonim faiwarim wontawar; ato wonigagam inan au kanfoun ingagat on, omi arimon nana fofonim faiwarim wontawar.

<sup>14</sup>On mes omi wontawar, wonbotitiwagim: God an dura maiauin on ami kaid ba nenemui wawaninai wongigin, yawas totorin on dogaram an rufafar mes dogaramui wonyein, <sup>15</sup>ato omi wonbotitiwagim tuf an Wasagobin wonkurereb aurin on akikiman ba ammui woniwanim. <sup>16</sup>Omi

ra fufur baitutum on beyan ba auman wonabar wonabib; on beyan auman wonabar wonabib on Afaguban an iyo wairaf eyoyour auman inrereben on omi arimon fofonim wonyafotai wonsibunin. <sup>17</sup>Ato God an yawas on kowas ba wonboai a God an dura on seri ba Ayu ebitem on wonboai wonigagam. <sup>18</sup>Atonio osi bobo engon tutufin wonbiyamai on wonbabayoi auman, God aurin wonifefeyan baibais mes. Ayu ebinetewarim on ra fufur wonbayoi. On yabinai omi matam woneit a omi men wonisuweigan mes; omi ra fufur God an sabu auris wonbayoi. <sup>19</sup>Omi on yau mat auriu wonbayoi, on an rai anbotitiwagiua dura baikakafun mes on, God arimon dura initeu, onai yau dura totor wat anikakafun men anaber mes a wasagobin buburin on anboai angkat sabu sintatam sinsagob. <sup>20</sup>Atonio wasagobin fasinai on yau anat Iesu Keriso an dura baikakafun an orot amatar, basit yau ari fafatum goai amama min on ato yau On an dura on abikakafun. Omi yau auriu wonbayoi onai yau on wasagobin aurin on dura totor wat ankurereb men anaber mes ato afofour ba.

#### **Baikakaiu Kanfoun**

<sup>21</sup>Tychicus, ot ati nuabo tait tuat a agirotin baitutumina Bada an boboi on arimon yau auriu on dura engon inkasonem wonsagob, onai omi wonsagob yau bobo mamaba abobo on. <sup>22</sup>On fasinai yau omi aurim abiyafarai. Wei engon tutufin nin mamaba wabobo on inkasonem wonsagob a on inkufaiwarim.

<sup>23</sup>Yau ababayoi God Tamat a Bada Iesu Keriso an tuf a an nuabo an baitutum on omi taitaiu tutuau on initem. <sup>24</sup>Yau God aurin ababayoi On an kabere on ato osi sabu iyabon ati Bada Iesu Keriso sibinuaboai on auris inama, On nuabo on an kanfoun ambin.